

皇清經解續編

皇清經解集編

皇清經解續編卷五百九十一

南菁書院

春秋左氏傳補注七

吳沈欽韓文起著

襄公

六年傳長相優 優謂優假饒益之

子罕善之如初 服云子罕不阿同族亦逐樂轡以正國法忠
之至也及樂轡射其門畏從華弱之罰復善樂轡是爲茹柔吐
剛喪其志矣傳故舉之明春秋之義善惡俱見按子罕宋之正
卿雖逐子蕩何患禍從乃昧惡惡之義抑心強梁是國之大命
得挾持之而執政爲虛器矣服義甚正杜說謬

堙之 曹操孫子注距堙者踊土稍高而前以附其城通典攻
城法于城外起土爲山乘城而上卽孫子所謂距闌也

年七傳郊祀后稷以祈農事也 月令孟春元日祈穀于上帝祈

穀之後卽擇日而耕郊特牲注易說曰三王之郊一用夏正生
民疏箋意定以正月爲郊高辛氏當以建寅之月爲正后稷高
辛氏之胄郊必正月是郊以祈農事在耕藉之前也

公登亦登 公食大夫禮公升二等賓升注云遠下人君惠云
韓非子載穆叔語曰今子不後寡君一等是其證也

委蛇 唐石經初刻蛇字郭忠恕佩觿曰委蛇之蛇余脂反蛇
是遮反虺也

衡而委蛇必折 言委蛇人臣常度當順行無愧纔有此容若
衡不順理猶復委蛇自得必致毀折者也衡指孫子之不後魯
君委蛇指孫子之無悛容

年八傳子國怒之曰韓非外儲左下子產忠于鄭君子國譙怒

之曰夫介異于人臣而獨于主主賢明能聽汝不明將不汝聽聽與不聽未可必知而汝已離于羣臣離于羣臣則必危汝身矣非徒危已也又且危父矣循彼文蓋卽此傳怒子產之辭而傳聞之訛也以彼文無事實本末故不入考異而附于此

楚師遼遠糧食將盡史記李左車曰千里饋糧士有飢色

悉索敝賦論語集解孔曰賦兵賦也小司徒疏凡出軍之法

先六鄉賦不止次出六遂賦猶不止徵兵于公邑及三等采賦猶不止乃徵兵于諸侯大國三軍次國二軍小國一軍此軍等皆出于鄉遂賦猶不止則諸侯有徧境出之法則千乘之賦是也大國三軍出自三鄉其餘公邑采地之民不在三軍之數成

元年疏古者用兵天子先用鄉鄉不足取遂遂不足取公卿采
邑及諸侯邦國若諸侯出兵先盡三鄉三遂鄉遂不足然後總
徵境內之兵此悉索敝賦亦謂總徵境內之兵也

不遑啟處 按古人坐席皆按膝故管甯藜牀著膝處皆穿也
以坐是跪故詩傳訓啟爲跪李巡曰啟小跪也以別于長跪不
遑啟處猶云不遑坐處

九傳用馬于四墉 校人職凡將事于四海山川則飾黃駒注
王巡守過大山川則有殺駒以祈沈禮與漢書溝洫志上自臨
決河湛白馬玉璧然則祈禳之事皆用馬牲用馬四墉此城隍
神之濫觴

相土因之 紀年帝相十五年商侯相土作乘馬遂遷于商邱

漢五行志相土代闕伯主少星宋其後也世司其占故先知火災

國亂無象言國無道極亂則天不復出妖變也說苑君道篇

楚莊王見天不見妖而地不出孽則禱于山川曰天其忘予歟遇艮之八劉禹錫集易九六論夫艮之隨惟二不動斯遇八也餘五位皆九六故反馬筮法以少爲卦主變者五而定者一故以八爲占艮之六二曰艮其腓不拯其隨其心不快史以爲東宮實幽也遇此爲不利故從變而占苟以說于姜也何則卦以少爲主若定者五而變者一卽宜曰之某卦觀之否師之臨之類是也變與定均卽決以內外今變者五定者一宜從少占懼不吉而更之故曰是謂艮之隨是謂之云者苟以說也故穆

姜終死于東宮與艮會耳而杜元凱于此注以爲雜用三易故有遇八之占非臻極之理也

艮之隨 汪琬曰隨內震外兌是動而得毀折之象也反體爲蠱蓋醫和所謂女惑男者以擬穆姜之爲人亦甚類矣又互體爲艮爲巽艮止巽入入而止焉其兆皆不能出彖辭雖无咎于穆姜乎何有而史云然者殆阿姜意而爲之諱也或謂艮之隨亦隨之艮信如此說則隨六二係小子失丈夫艮六二艮其腓不拯其隨其心不快又皆不可出之象明矣

隨其出也 隨初九爻出門交有功惠氏周易述帝出乎震故震爲出初爻交坤故爲交震方伯之卦當春分春分在卯說文曰卯象開門之形二月爲天門故震爲開門隨于消息爲二月

卦按此云隨其出也以此

固在下位 虞翻曰隨象陰隨陽惠云婦人當陰爻例居下位

謂六二

不靖國家 惠云靖讀爲靜婦人體坤當安于承天之正則亨

今效坤亂故不可爲亨

作而害身不可謂利 坤爲身爲害

棄位而姦 棄位猶爻之失位不正故不可爲貞服讀姦爲放

效之效乾鑿度曰佼易立節或作劬姦佼字本通易繫辭知崇

禮卑崇效天卑法地惠氏周易述云崇效天五卑法地二穆姜

自言棄坤之正位而效乾之佼易也杜謂姦淫之別名此野文

也

斬行栗 惠云鄭風東門之栗毛傳栗行上栗也按釋宮行道也周語列樹以表道

公子嘉 說文孔從乞從子乞謂子之候鳥乞至而得子嘉美之也古人名嘉字子孔

閏月 杜預云此年不得有閏月疑閏月當爲門五日衛冀隆難杜云按昭二十年朔旦冬至其年云閏月戊辰殺宣姜又二十年云閏月取前城並不應有閏是史之錯失不必皆在應閏之限杜豈得云此年不得有閏而改爲門五日也蘇寬云杜爲長麻十年十二月後置閏旣十年有閏明九年無閏也欽韓按杜預長麻彼自編排日月爲解詁之用本非魯麻十年之閏亦其意造何知魯閏不於九年而必於十年置閏乎杜自以十年

置閏而于此年閏月不可通則改爲門五日衛氏之難深中其病而蘇寬以杜解杜斯笨伯也

冠而生子禮也 高誘淮南汜論訓注國君十二歲而冠冠而娶十五而生子按文王十三歲生伯邑考十四歲生武王前哲故事故云禮也

以先君之祧處之 祭法注云天子遷廟之主以昭穆合藏于二祧之中諸侯無祧藏於祖考之廟中

魏絳請施舍 鄉師注云施舍謂應復免不給繇役

所以幣更 管子四時篇除神位謹禱幣梗劉績注淮南子仲春祭不用犧牲用圭璧更皮幣疑此乃幣更誤按高誘注更代也周禮女祝注杜子春讀梗爲更

十傳挾之以出門者 服云挾櫪也謂以木櫪挾縣門使舉令

下容人出也按呂覽慎大篇孔子之勁舉國門之關而不肯以力聞淮南道應訓孔子勁杓國門之關又主術訓孔子力招城關高誘云招舉也以一手招城門關端能舉之此皆鄉人紇之事傳誤也關櫪也服謂以木櫪挾之門關卽木櫪也

以爲櫓 孫子謀攻篇注李筌曰櫓楯也以蒙首而趨城下杜

牧曰櫓卽今之所謂彭排按漢書劉屈氂傳以牛車爲櫓卽與狄虎彌此事同蓋倉卒不備器械借以禦矢石也呂覽貴直論趙簡子攻衛居于犀蔽屏櫓之下是櫓固以革蒙之小戎詩所謂蒙伐有苑解詩者以蒙爲雜羽似非

以成一隊 杜預云百人爲隊按通典司馬穰苴曰五人爲伍

十伍爲隊一說五人爲列二列爲火五火爲隊

五十人

是一隊

不得有百人也狄虺彌執櫓拔戟以預此一隊史記孫武子以吳王寵姬二人各爲隊長皆令持戟是也

請以桑林 莊子養生主合于桑林之舞乃中經首之會釋文

司馬云桑林湯樂名經首咸池樂章也呂氏順民篇湯以身禱于桑林注桑山之林能興雲出雨也

題以旌夏 夏雉羽也禹貢傳夏翟翟雉名羽中旌旄周禮樂

師職凡舞有帔舞有羽舞有皇舞鄭司農云帔舞者全羽羽舞者析羽皇舞者以羽冒覆頭上此題以旌夏卽先鄭所云皇舞也廣雅釋親題額也其形象非常故晉侯懼杜訓夏爲大夫旌非舞人所能持也

於是子駟當國 當國爲專大政其次爲聽政則與聞政事而不能專也如魯季氏則當國而叔氏孟氏爲聽政漢之大將軍霍光王鳳爲當國而丞相御史大夫則聽政宋平章事與參知政事亦其次弟也杜預乃云攝君事至襄十九年猶云簡公尙幼故大夫當國所謂言僞而堅也

以位序聽政辟 服云鄭舊世卿父死子代今子孔欲擅改之使以次先爲士大夫乃至卿也按襄十九年傳立子產爲卿服說是也若如杜預解則有國之常法何須爲載書乎子產勸焚書所謂可使由之不可使知之其實約束已定未之改也

其能來東底乎

釋詁底止也邵晉涵曰底通作祗何人斯云

俾我祗也鄭箋祗安也安亦爲止也杜訓底爲至與來義複

下而無直則何謂正矣 劉炫曰七年傳云正直爲正正曲爲
直晉斷王朝之獄乃以下正上宣子若在下而無直心何以謂
之爲正也勸宣子使心正按炫言非也瑕禽言王叔之勢居上
伯輿勢居其下若使在上者恃勢得直在下者雖有理而不得
直則何以謂之正直爲正乎此言兩造之曲直非斥宣子鵬冠
子迭遠篇萬賤之直不能撓一貴之曲此之謂也
王叔氏不能舉其契 小宰注凡簿書之最目獄訟之要辭皆
曰契釋名契刻也刻識其數也按其數則謂之契齒

年十一 經齊世子光 杜預云世子光至復在莒子之先故晉悼

亦進之按先滕先莒皆以爲先至先滕猶有傳文先莒復何所
據若使光先于宋魯將超在宋上乎愚以爲此經據舊文采錄

本無義例

公至自會 杜預云以會至者觀兵而不果侵伐按上經明言伐鄭何謂不果侵伐言至自會者與會于蕭魚相接也

傳不入者倍征 按三家既各分一軍則徵發兵役皆出于所領之軍所謂役邑入者也無征于常調之外無征也其不在軍行者主貢公之租稅而已既不與兵役則倍其征所謂不入者倍征也杜解不近人情季氏已三分公室何用驅之

晉侯以樂之半賜魏絳 周禮小胥鄭注云鍾一堵磬一堵謂之肆按樂之半則鍾八磬八注又云諸侯之卿大夫半天子之卿大夫也賈公彥云以天子卿大夫判縣之一肆分爲東西

庶長鮑 續漢志注劉劭爵制曰春秋傳有庶長鮑商君爲政

備其法品爲十八級合關內侯列侯凡二十等按第十爵左庶長十一爵右庶長十七爵駟車庶長十八爵大庶長

年十二經吳子乘卒杜預云公不與盟而赴以名劉炫云杜五

年注公及其盟還不以盟告廟今云不與盟自相矛盾服云壽夢發聲吳蠻夷言多發聲數語共成一言壽夢一言也經言乘傳言壽夢欲使學者知之按夢乘聲同今徽州甯國人猶然

傳臨于周廟禮也左氏但言臨同姓于廟爲禮檀弓云兄弟吾哭諸廟奔喪云哭父之黨于廟是也其文王廟得立以否其是非人人知之左氏固不論也劉敞不循事端而輒譏左氏非也

年十三傳小人農力以事其上廣雅釋詁農勉也魏了翁讀書